


雜阿含經

第三十

二百七十三
川十

123456



雜阿含經卷第三十

宋天竺三藏求那跋陀羅譯

如是我聞一時佛住崩伽闍崩伽耆林中爾
時世尊為諸比丘說戒相應法讚歎制戒法
爾時尊者迦葉氏於崩伽聚落住聞世尊說
戒相應法讚歎是戒極心不忍不喜言此沙
門極讚歎是戒極制是戒今時世尊於崩伽
聚落隨所樂住已向舍衛國去次第遊行至
舍衛國祇樹給孤獨園時尊者迦葉氏世尊
去後不久心即生悔我今失利得大不利於
世尊所說戒相應法讚歎制戒時於世尊所
心不忍不喜心不歡喜而作是言沙門極利

是戒極讚歎是戒時尊者迦葉氏夜過晨朝
著衣持鉢入崩伽聚落乞食食已還精舍付
囑卧具自持衣鉢向舍衛城次第遊行至舍
衛國舉衣鉢洗足已詣世尊稽首禮足白佛
言悔過世尊悔過善逝我愚我癡不善不辯
我聞世尊為諸比丘說戒相應法讚歎制戒
時於世尊所不忍不喜心不欣樂而作是言
是沙門極制是戒讚歎是戒佛告迦葉氏汝
何時於我所心不忍不喜不生欣樂而作是
言此沙門極制是戒讚嘆是戒迦葉氏白佛
言時世尊於崩伽闍聚落崩伽耆林中為諸
比丘說戒相應法讚歎是戒我今時於世尊

所心得不忍不歡喜心不欣樂而作是言是
沙門極制是戒讚歎是戒世尊我今日自知
罪悔自見罪悔唯願世尊受我悔過哀愍故
佛告迦葉氏汝自知悔愚癡不善不辯聞我
為諸比丘說戒相應法讚歎制戒而於我所
不忍不喜心不欣樂而作是言是沙門極制

是戒極歎是戒汝今迦葉自知悔自見悔已
於未來世律儀戒生戒今授汝哀愍故迦葉
氏如是悔者善法增長終不退減所以者何
若有自知罪自見罪而悔過者於未來世律
儀戒生善法增長不退減故政使迦葉為上
座者不欲學戒不重於戒不歎制戒如是比

丘我不讚歎所以者何若大師所讚歎者餘人則復與相習近恭敬親重若餘人與相習近親重者則與同見同彼所作同彼所作者長夜當得不饒益苦是故我於彼長老初不讚歎以其初始不樂學戒故如長老中年少年亦如是若是上座長老初始重於戒學讚歎制戒如是長老我所讚歎以其初始樂戒學故大師所讚歎者餘人亦當與相習近親重同其所見同其所見故於未來世彼當長夜以義饒益是故於彼長老比丘常當讚歎以初始樂學戒故中年少年亦復如是佛說此經已諸比丘聞佛所說歡喜奉行

如是我聞一時佛住舍衛國祇樹給孤獨園
尔時世尊告諸比丘若諸上座長老比丘初
始不樂學戒不重於戒見餘比丘初樂學戒
重於戒讚歎制戒者彼亦不隨時讚歎美哉
於此等比丘所亦不讚歎以其初始不樂學
戒故所以者何若大師讚歎彼者餘人當復
習近親重同其所見以同其所見故長夜當
受不饒益苦是故我於彼長老中年少年亦
復如是樂戒者如前說佛說此經已諸比丘
聞佛所說歡喜奉行

如是我聞一時佛住舍衛國祇樹給孤獨園
尔時世尊告諸比丘有在學何等為三謂增

上戒學增上意學增止慧學何等為增上戒
學若比丘住於戒波羅提木叉具足威儀行
處見微細罪則生怖畏受持學戒是名增上
戒學何等為增上意學若比丘離諸惡不善
法有覺有觀離生喜樂初禪具足住乃至第
四禪具足住是名增上意學何等為增上慧
學若比丘此苦聖諦如實知此苦集聖諦此
苦滅聖諦此苦滅道跡聖諦如實知是名增
上慧學佛說此經已諸比丘聞佛所說歡喜
奉行

三學餘經如前念處說

如禪如是無量無色如四聖諦如是四念處

四正斷四如意足五根五力七覺分八聖道
四道四法句止觀修習亦如是說

如是我聞一時佛住毗舍離國狝猴池側重
閣講堂時有善調象師離車名曰難陀來詣
佛所稽首佛足退坐一面介時世尊告離車
難陀言若聖弟子成就四不壞淨者欲求壽
命即得壽命求好色力樂辯自在即得何等
為四謂佛不壞淨成就法僧不壞淨聖戒成
就我見是聖弟子於此命終生於天上於天
上得十種法何等為十得天壽天色天名稱
天樂天自在天色聲香味觸若聖弟子於天
上命終來生人中者我見彼十事具足何等

為十人間壽命人好色名稱樂自在色聲香味
觸我說彼多聞聖弟子不由他信不由他欲
不從他聞不取他意不因他思我說彼有如
實正慧知見尔時難陀有從者白難陀言浴
時已到今可去矣難陀答言我今不須人間
澡浴我今於此勝妙法以自沐浴所謂於世

尊所得清淨信樂尔時離車調象師難陀聞
佛所說歡喜隨喜從座起作禮而去

如是我聞一時佛住毗舍離國狝猴池側重
閣講堂尔時世尊告諸比丘若聖弟子成就
四不壞淨者不於人中貧活而活不寒乞自
然富足何等為四謂於佛不壞淨成就法僧

聖戒不壞淨成就是故比丘當如是學我當
成就於佛不壞淨法僧不壞淨聖戒成就佛
說此經已諸比丘聞佛所說歡喜奉行

如是我聞一時佛住舍衛國祇樹給孤獨園
尔時世尊告諸比丘轉輪王七寶具足成就
人中四種神力王四天下身壞命終生於天
上雖復轉輪聖王七寶具足成就人間神力
王四天下身壞命終得生天上然猶未斷地
獄畜生餓鬼惡趣之苦所以者何以轉輪王
不得於佛不壞淨法僧不壞淨聖戒不成就
故多聞聖弟子持糞掃衣家家乞食草屨卧
具而彼多聞聖弟子解脫地獄畜生餓鬼惡

趣之苦所以者何以彼多聞聖弟子於佛不
壞淨法僧不壞淨聖戒成就是故諸比丘當
作是學於佛不壞淨法僧不壞淨聖戒成就
佛說此經已諸比丘聞佛所說歡喜奉行
如是我聞一時佛住舍衛國祇樹給孤獨園
尔時世尊告諸比丘汝等當趣哀愍心慈悲
心若有人於汝等所說樂聞樂受者汝當爲
說四不壞淨令入令住何等爲四於佛不壞
淨於法不壞淨於僧不壞淨於聖戒成就所以
者何若四大地水火風有變易增損此四不
壞淨未嘗增損變異彼無增損變異者謂多
聞聖弟子於佛不壞淨成就若墮地獄畜生

餓鬼者無有是處。是故諸比丘當作是學。我
當成就於佛。不壞淨法。僧不壞淨。聖戒成就
亦當建立。餘人令成就。佛說此經已。諸比丘
聞佛所說歡喜奉行。

如是我聞。一時佛住舍衛國祇樹給孤獨園。
尔時世尊告諸比丘。若信人者。生五種過患。
彼人或時犯戒違律。爲衆所棄。恭敬其人者。
當作是念。此是我師。我所敬重。衆僧棄薄我。
今何緣入彼塔寺。不入塔寺已。不敬衆僧。不
敬僧已。不得聞法。不聞法已。退失善法。不得
久住於正法中。是名信敬人。生初過患。復次
敬信人者。所敬之人犯戒違律。衆僧爲作不

見舉敬信彼人者當作是念此是我師我所
敬重而今衆僧作不見舉我今何緣復入塔
寺不入塔寺已不敬衆僧不敬衆僧已不得
聞法不聞法已退失善法不得久住於正法
中是名敬信人故生第二過患復次彼人若
持衣鉢餘方遊行敬彼人者而作是念我所
敬人著衣持鉢餘方遊行我今何緣入彼塔
寺不入塔寺已不得恭敬衆僧不敬衆僧已
不得聞法不聞法已退失善法不得久住於
正法中是名敬信人故生第三過患復次彼
所信敬人捨戒還俗敬信彼人者而作是念
彼是我師我所敬重捨戒還俗我今不應入

彼塔寺不入寺已不敬衆僧不敬僧已不得
聞法不聞法已退失善法不得久住於正法
中是名敬信人故生第四過患復次彼所信
敬人身壞命終敬信彼人者而作是念彼是
我師我所敬重今已命終我今何緣入彼塔
寺不入寺故不得敬僧不敬僧已不得聞法

不聞法故退失善法不得久住於正法中是
名敬信人故生第五過患是故諸比丘當如
是學我當成就於佛不壞淨於法僧不壞淨
聖戒成就佛說此經已諸比丘聞佛所說歡
喜奉行

如是我聞一時佛住舍衛國祇樹給孤獨園

尔時世尊告諸比丘有四種食長養衆生四大增長攝受何等爲四謂揣食觸食意思食識食如是福德潤澤爲安樂食何等爲四謂於佛不壞淨於法僧不壞淨聖戒成就是故諸比丘當作是學我當成就於佛不壞淨於法僧不壞淨聖戒成就佛說此經已諸比丘聞佛所說歡喜奉行

如是我聞一時佛住舍衛國祇樹給孤獨園尔時世尊告諸比丘如上說差別者於佛不壞淨成就者爲聞法衆僧所念聖戒成就佛說此經已諸比丘聞佛所說歡喜奉行次經亦如上說差別者若於佛不壞淨成就

者法僧慳垢纏衆生離慳垢心在家而住解脫心施常行樂施常樂於捨行平等施聖戒成就佛說此經已諸比丘聞佛所說歡喜奉行次經亦如上說差別者如是聖弟子四種福德潤澤善法潤澤攝受稱量功德不可稱量尔所果福尔所果尔所福果集然彼得衆多福利是大功德聚數譬如五河合流謂恒河耶菩那薩羅由伊羅跋提摩醯於彼諸水無能度量百瓶千瓶百千万瓶者然彼水多是大水聚數如是聖弟子成就四功德潤澤者無能度量其福多少然彼多福是大功德聚數是故諸比丘當作是學我當成就於佛不

壞淨於法僧不壞淨聖戒成就尔時世尊即

說偈言

衆吉之巨海

自淨能淨彼

汪洋而平流

實諸百川長

一切諸江河

群生之所依

悉歸於大海

此身亦復然

施戒修功德

百福流所歸

如是我聞一時佛住舍衛國祇樹給孤獨園

尔時世尊告諸比丘婆羅門者說虛僞道愚

癡惡邪不正趣向非智等覺向於涅槃彼作

如是化諸弟子於十五日以胡麻屑菴羅摩

羅屑沐浴身體著新劫貝頭垂長縷牛屎塗

地而卧於上言善男子晨朝早起脫衣舉著

一處騾其形體向東方馳走正使道路逢凶
象惡馬狂牛獠狗棘刺叢林坑澗深水直前
莫避遇害死者必生梵天是名外道愚癡邪
見非智等覺向於涅槃我爲弟子說平等路
非愚癡向智慧等覺向於涅槃謂八聖道正
見乃至正定佛說此經已諸比丘聞佛所說
歡喜奉行

如是我聞一時佛住舍衛國祇樹給孤獨園
介時世尊告尊者舍利弗所謂流者何等爲
流舍利弗白佛言世尊所說流者謂八聖道
復問舍利弗謂入流分何等爲入流分舍利
弗白佛言世尊有四種入流分何等爲四謂

親近善男子聽正法內正思惟法次法向復
問舍利弗入流者成就幾法舍利弗白佛言
有四分成就入流者何等爲四謂於佛不壞
淨於法不壞淨於僧不壞淨聖戒成就佛告
舍利弗如汝所說流者謂八聖道入流分者
有四種謂親近善知識聽正法內正思惟法
次法向入流者成就四法謂於佛不壞淨於
法不壞淨於僧不壞淨聖戒成就佛說此經
已尊者舍利弗聞佛所說歡喜奉行

如是我聞一時佛住舍衛國祇樹給孤獨園
尔時尊者舍利弗詣尊者阿難所問評慰勞
已退住一面尊者舍利弗語尊者阿難欲有

所問寧有閑暇爲記說不尊者阿難語舍利
弗隨意所問知者當答舍利弗問尊者阿難
爲斷幾法如來應等正覺正知所見記說彼
人得須陁洹不墮惡趣法決定向正覺七有
天人往生究竟苦邊尊者阿難語尊者舍利
弗斷四法成就四法如來應等正覺記說彼
人得須陁洹不墮惡趣法決定向三菩提七
有天人往生究竟苦邊何等爲四謂聖弟子
於佛不信住則已斷已知成就於佛不壞淨
於法僧不信惡戒彼則已斷已知成就法僧
不壞淨及聖戒成就如是四法斷四法成就
如來應等正覺所知所見記說彼人得須陁

洎不墮惡趣法決定正向三菩提十有天人
往生究竟苦邊尊者阿難語尊者舍利弗如
是如是四法斷四法成就如來應等正覺所
知所見記說彼人得須陁洎決定向三菩提
十有天人往生究竟苦邊時二正士共論議
已展轉隨喜從座起去

如是我聞一時佛住舍衛國祇樹給孤獨
園介時世尊告諸比丘若比丘於五恐
怖怨對休息三事決定不生疑惑如實知見
賢聖正道彼聖弟子能自記說地獄畜生餓
鬼惡趣已盡得須陁洎不墮惡趣法決定正
向三菩提十有天人往生究竟苦邊何等為

五恐怖怨對休息若殺生因緣罪怨對恐怖
生若離殺生者彼殺生罪怨對因緣生恐怖
休息若偷盜邪婬妄語飲酒罪怨對因緣生
恐怖彼若離偷盜邪婬妄語飲酒罪怨對者
因緣恐怖休息是名罪怨對因緣生五恐怖
休息何等為三事決定不生疑惑謂於佛決
定離於疑惑於法僧決定離疑惑是名三法
決定離疑惑何等名為聖道如實知見謂此
苦聖諦如實知此苦集聖諦此苦滅聖諦此
苦滅道跡聖諦如實知是名聖道如實知見
若於此五恐怖罪怨對休息於三法決定離
疑惑於聖意如實知見是聖弟子能自記說

我地獄盡畜生餓鬼惡趣盡得須陀洹不墮
惡趣法決定正趣三菩提七有天人往生究
竟苦邊佛說此經已諸比丘聞佛所說歡喜
奉行

如是我聞一時佛住舍衛國祇樹給孤獨園
尔時世尊告諸比丘如上說差別者何等爲
聖道如實知見謂八聖道正見乃至正定次
經亦如是說差別者何等爲聖道如實知見
謂十二支緣起如實知見如所說是事有故
是事有是事起故是事起如緣無明行緣行
識緣識名色緣名色六入處緣六入處觸緣
觸受緣受愛緣愛取緣取有緣有生緣生老

病死憂悲惱苦是名聖弟子如實知見佛說
此經已諸比丘聞佛所說歡喜奉行

如是我聞一時佛住舍衛國祇樹給孤獨園
尔時世尊告諸比丘有諸天天道未淨衆生
令淨已淨者重令淨何等爲四謂聖弟子於
佛不壞淨於法僧不壞淨聖戒成就是名四
種諸天天道未淨衆生令淨已淨者重令淨
佛說此經已諸比丘聞佛所說歡喜奉行
如是我聞一時佛住舍衛國祇樹給孤獨園
尔時世尊告諸比丘有四種諸天天道何等
爲四謂聖弟子念如來事如是如來應等正
覺明行足善逝世間解無上士調御丈夫天

人師佛世尊於此如來事生隨喜心隨喜已
心歡悅心歡悅已身猗息身猗息已覺受樂
覺受樂已三昧定三昧定已聖弟子作如是
學何等爲諸天天道復作是念我聞無恚爲
上諸天天道作是念我從今日於世間若怖
若安不起瞋恚我但當自受純一滿淨諸天
天道是名第一諸天天道未淨衆生令淨已
淨者重令淨復次比丘聖弟子念於法事謂
如來說正法律現法離諸熾然不待時節通
達涅槃即身觀察緣自覺知如是知法事已
心生隨喜隨喜已身猗息身猗息已覺受樂
覺受樂已三昧定三昧定已聖弟子作如是

學何等諸天天道復作是念我聞無志爲
上諸天天道我從今日於此世間若怖若安
不起瞋恚我當受持純一滿淨諸天天道是
名第二諸天天道復次比丘若於僧事起於
正念謂世尊弟子僧正直等向所應恭敬尊
重供養無上福田彼如是於諸僧事正憶念
已心生隨喜心隨喜已得歡悅歡悅已身猗
息身猗息已覺受樂覺受樂已三昧定三昧
定已彼聖弟子作如是學何等諸天天道復
作是念我聞諸天無恚爲上諸天天道我從
今日於諸世間若怖若安不起瞋恚我但當
受持純一滿淨諸天天道是名第三諸天天

道復次。比丘。謂聖弟子。自念所有戒事。隨憶念言。我於此。不缺戒。不汙戒。不雜戒。明智所歎。戒智者。不馱戒。於如是等戒事。正憶念已。心生隨喜。隨喜已。歡悅。歡悅已。身猗息。覺受樂。猗息。覺受樂已。三昧定。三昧定已。聖弟子。作是念。何等為諸天天道。復作是念。我聞諸天無恚。為上。我從今日。於諸世間。若怖若安。不起瞋恚。我當受持純一。滿淨諸天天道。是名第四諸天天道。未淨衆生。令淨已。淨者。重令淨。佛說此經已。諸比丘。聞佛所說。歡喜奉行。如是我聞。一時佛住舍衛國祇樹給孤獨園。尔時世尊告諸比丘。有四種諸天天道。未淨。

衆生令淨已淨者增其淨何等爲四謂聖弟子念如來事如是如來應等正覺明行足善逝世間解無上士調御丈夫天人師佛世尊彼如是念如來事已則斷惡貪及斷心惡不善過念如來故心生隨喜心隨喜已則歡悅歡悅已身猗息身猗息已覺受樂覺受樂已三昧定三昧定已聖弟子作如是學何等爲諸天天道復作是念我聞無恚爲上諸天天道我從今日於諸世間若怖若安不起瞋恚但當受持純一滿淨諸天天道如是法僧聖戒成就亦如是說佛說此經已諸比丘聞佛所說歡喜奉行

如是我聞一時佛住舍衛國祇樹給孤獨園
尔時世尊告諸比丘有四種諸天天道未淨
眾生令淨已淨者增其淨何等爲四謂聖弟
子念如來事如是如來應等正覺明行足善
逝世間解無上士調御丈夫天人師佛世尊
彼聖弟子念如來事已心貪欲纏瞋恚愚癡
纏其心正直念如來事是聖弟子得法流水
得義流水得念如來饒益隨喜隨喜已生歡
悅歡悅已身猗息身猗息已覺受樂覺受樂
已三昧定三昧定已聖弟子作如是學何
等爲諸天天道復作是念我聞無恚爲上諸
天天道我從今日於諸世間不起瞋恚純一

滿淨諸天天道如是法僧聖戒成就亦如是
說佛說此經已諸比丘聞佛所說歡喜奉行
如是我聞一時佛往舍衛國祇樹給孤獨園
尔時世尊告諸比丘我今當說法鏡經諦聽
善思當爲汝說何等爲法鏡經謂聖弟子於
佛不壞淨於法僧不壞淨聖戒成就是名法
鏡經佛說此經已諸比丘聞佛所說歡喜奉行
如是我聞一時佛住舍衛國祇樹給孤獨園
時有衆多比丘著衣持鉢入舍衛城乞食乞
食時聞難屠比丘命終難陀比丘左命終善
生優婆塞命終善生優婆夷命終乞食已還
精舍舉衣鉢洗足已詣佛所稽首禮足退坐

一面白佛言。世尊。我今晨朝入舍衛城乞食。聞難屠比丘難陀比丘。及善生優婆塞善生。優婆夷命終。世尊。彼四人命終。應生何處。佛告諸比丘。彼難屠比丘難陀比丘。及諸漏已盡。無漏心解脫。慧解脫。現法自知。作證。我生已盡。梵行已立。所作已作。自知不受。後有善生。優婆塞善生。優婆夷。五下分結盡。得阿那含。生於天上。而般涅槃。不復還生。此世。亦時。世尊。告諸比丘。我今當為汝說法鏡經。於佛不壞淨。乃至聖戒。成就是名法鏡經。佛說此經已。諸比丘。聞佛所說。歡喜奉行。

如是我聞。一時佛住舍衛國祇樹給孤獨園。

如上廣說差別者有異比丘異比丘在異優婆塞異優婆夷命終亦如上說

如是我聞一時佛住那梨迦聚落繁耆迦精舍
舍爾時那梨迦聚落多人命終時有衆多比丘
著衣持鉢入那梨迦聚落乞食聞那梨迦聚
落罽迦舍優婆塞命終左邊吒佉楞伽羅迦
多梨沙婆闍露優婆闍露梨色吒阿梨色吒
跋陀羅須跋陀羅耶舍耶輸陀耶舍鬱多羅
悉皆命終聞已還精舍舉衣鉢洗足已詣佛
所稽首佛足退坐一面白佛言世尊我等衆
多比丘晨朝入那梨迦聚落乞食聞罽迦舍
優婆塞等命終世尊彼等命終當生何處佛

告諸比丘彼罽迦舍等已斷五下分結得阿
那含於天上般涅槃不復還生此世諸比丘
白佛世尊復有過二百五十優婆塞命終復
有五百優婆塞於此那梨迦聚落命終皆五
下分結盡得阿那含於彼天上般涅槃不復
還生此世復有過二百五十優婆塞命終皆
三結盡貪恚癡薄得斯陀含當受一生究竟
苦邊此那梨迦聚落復有五百優婆塞於此
那梨迦聚落命終三結盡得須陀洹不墮惡
趣法決定正向三菩提七有天人往生究竟
苦邊佛告諸比丘汝等隨彼命終彼命終而
問者徒勞耳非是如來所樂答者夫生者有

死何足爲竒如來出世及不出世法性常住
彼如來自知成等正覺顯現演說分別開示
所謂是事有故是事有是事起故是事起緣
無明有行乃至緣生有老病死憂悲惱苦如
是苦陰集無明滅則行滅乃至生滅則老病
死憂悲惱苦滅如是苦陰滅今當爲汝說法
鏡經諦聽善思當爲汝說何等爲法鏡經謂
聖弟子於佛不壞淨於法僧不壞淨聖戒成
就佛說此經已諸比丘聞佛所說歡喜奉行
如是我聞一時佛住舍衛國祇樹給孤獨園
時有難提優婆塞來詣佛所誓首佛足退坐
一面白佛言世尊若聖弟子於此五根一切

時不成就者爲放逸爲不放逸佛告難提若
於此五根一切時不成就者我說此等爲凡
夫數若聖弟子不成就者爲放逸爲不放逸
難提若聖弟子於佛不壞淨成就而不上求
不於空閑林中若露地坐晝夜禪思精勤修
習勝妙出離饒益隨喜彼不隨喜已歡喜不
生歡喜不生已身不猗息身不猗息已苦覺
則生苦覺生已心不得定心不得定者是聖
弟子名爲放逸於法僧不壞淨聖戒成就亦
如是說如是難提若聖弟子成就於佛不壞
淨其心不起知足想於空閑林中樹下露地
晝夜禪思精勤方便能起勝妙出離隨喜隨

喜已生歡喜生歡喜已身猗息身猗息已覺
受樂覺受樂已心則定若聖弟子心定者名
不放逸法僧不壞淨聖戒成就亦如是說佛
說此經已難提優婆塞聞佛所說歡喜隨喜
從座起禮佛足而去

如是我聞一時佛住舍衛國祇樹給孤獨園
時有釋氏難提來詣佛所誓首佛足退坐一
面白佛言世尊若聖弟子於四不壞淨一切
時成就者是聖弟子為是放逸為不放逸佛
告釋氏難提若於四不壞淨一切時不成就
者我說是等為外凡夫數釋氏難提若聖弟
子放逸不放逸今當說廣說如上佛說此經

已釋氏難提聞佛所說歡喜隨喜從座起作禮而去

如是我聞一時佛住舍衛國祇樹給孤獨園前三月夏安居竟有衆多比丘集於食堂爲佛縫衣如來不久作衣竟當著衣持鉢出精舍人間遊行時釋氏難提聞衆多比丘集於食堂爲佛縫衣如來不久作衣竟著衣持鉢人間遊行釋氏難提聞已來詣佛所誓首禮足退坐一面白佛言世尊我今四體支解四方易韻先所聞法今悉迷忘聞衆多比丘集於食堂爲世尊縫衣言如來不久作衣竟著衣持鉢人間遊行是故我今心生大苦何時

當復得見世尊及所知識比丘佛告釋氏難
提汝見佛若不見佛若見知識比丘若不見
汝當隨時修習五種歡喜之處何等爲五汝
當隨時念如來事如來應等正覺明行足善
逝世間解無上士調御丈夫天人師佛世尊
法事僧事自持戒事自行世事隨時憶念我
得己利我於慳垢衆生所當多修習離慳垢
住修解脫施捨施常熾然施樂於捨平等惠
施常懷施心如釋氏難提此五支定若住
若行若坐若卧乃至妻子俱常當繫心此三
昧念佛說此經已釋氏難提聞佛所說歡喜
隨喜作禮而去

如是我聞一時佛住舍衛國祇樹給孤獨園
前三月夏安居時有釋氏難提聞佛於舍衛
國祇樹給孤獨園前三月結夏安居聞已作
是念我當往彼并復於彼造作供養衆事供
給如來及比丘僧即到彼三月竟時衆多比
丘集於食堂爲世尊縫衣而作是言如來不
久作衣竟著衣持鉢人間遊行時釋氏難提
聞衆多比丘集於食堂言如來不久作衣竟
著衣持鉢人間遊行聞已來詣佛所稽首禮
足退住一面白佛言世尊我今四體支解四
方易韻先所受法今悉迷忘我聞世尊人間
遊行我何時當復更見世尊及諸知識比丘

佛告釋氏難提若見如來若不見若見知識
比丘若不見汝當隨時修於六念何等爲六
當念如來法僧事自所持戒自所行施及念
諸天佛說此經已釋氏難提聞佛所說歡喜
隨喜作禮而去

如是我聞一時佛住舍衛國祇樹給孤獨園
前三月結夏安居如前說差別者時有長者
多梨師達多及富蘭那兄弟二人聞衆多比
丘集於食堂爲世尊縫衣如上難提修多羅
廣說佛說此經已梨師達多長者及富蘭那
聞佛所說歡喜隨喜從座起作禮而去
如是我聞一時佛住舍衛國祇樹給孤獨園

前三月結夏安居竟衆多比丘集於食堂爲
世尊縫衣時有長者梨師達多及富蘭那兄
弟二人於鹿徑澤中修治田業聞衆多比丘
在於食堂爲世尊縫衣言如來不久作衣竟
著衣持鉢人間遊行聞已語一士夫言汝今
當往詣世尊所瞻視世尊若必去者速來語
我時彼士夫即受教勅往到一處見世尊出
即速來還白梨師達多及富蘭那世尊已來
及諸大衆時梨師達多及富蘭那往迎世尊
世尊遙見梨師達多及富蘭那隨路而來即
出路邊敷屣師壇正身端坐梨師達多及富
蘭那稽首佛足退坐一面白佛言世尊我今

四體支解四方易韻所憶念事今悉迷忘何
時當復得見世尊及諸知識比丘世尊今出
至拘薩羅從拘薩羅至伽尸從伽尸至摩羅
從摩羅至摩竭陀從摩竭陀至殃伽從殃伽
至修摩從修摩至分陀羅從分陀羅至迦陵
伽是故我今極生憂苦何時當復得見世尊
及諸知識比丘佛告梨師達多及富蘭那汝
見如來及不見如來見諸知識比丘及不見
汝且隨時修習六念何等爲六汝當念如來事
廣說乃至念天然其長者在家憤撓在家染
著出家空閑難可俗人處於非家一向鮮潔
純一滿淨梵行清白長者白佛竒哉世尊善

說此法在家憤撓在家染著出家空閑難可
俗人處於非家一向鮮潔純一滿淨梵行清
白我是波斯匿王大臣波斯匿王欲入園觀
令我乘於大象載王第一宮女一在我前一
在我後我坐其中象下坂時前者抱我頸後
者攀我背象上坂時後者抱我項前者攀我
衿彼諸姝女爲娛樂王故衣繒綵衣著衆妙
香瓔珞莊嚴我與同遊常護三事一者御象
恐失正道二自護心恐生染著三自護持恐
其顛墜世尊我於介時於王姝女無一刹那
不正思惟佛告長者善哉善哉能善護心長
者白佛我在家中所行財物常與世尊及諸

比丘比丘丘優婆塞優婆夷等共受用不計
我所佛告長者善哉善哉汝拘薩羅國錢財
巨富無有與汝等者而能於財不計我所介
時世尊為彼長者種種說法示教照喜示教
照喜已從座起去

雜阿含經卷第三十

川

滌子老反搯徒官汪烏光屑先結獠昌制佉
楞上丘迦反坂方晚衿居吟
下郎登反坂反衿反

